

EDITORIAL

E diskushon riba 'Sak'e boem'

E topiko di diskushon e dianan aki ta e famoso kansion "Saka e Boem Boem" ku ta birando e himo di Karnaval pa 1995. E forma ku e piesa aki a bin ta desaroyá no tin duda ku e aña aki e lo ta e road-march di Kòrsou, banda di e tumbanan di e aña aki. Pa di prome biaha nos ta haña ku un piesa ku no ta un di e tumbanan ku a pasa den Festival di Tumba di e aña aki ta bira un di e piesanan favorito di pueblo. Sinembargo awe den nos komentario nos kier a para un ratu ketu riba e diskushonnan ku tini rondó di e forma ku e piesa aki ta ser bailá aki na Kòrsou. For di siman pasá nos a bin tuma nota di e formá kon den e diferente jump-up nan e piesa aki tabata ser bailá i esaki sigur a hala nos atenshon. No ta pornada djabièrnè riba nos portada, nos a publika un foto kaminda nos a ilustrá kon e baile aki tabata ser bailá na e okashon aki.

Siman pasá outor di Saka e Boem, Claudius Philips tabata na Kòrsou, kaminda ela duna un splikashon di e piesa aki. Bon kla ela muestra ku e piesa aki ningun ora so no a ser trahá ku un baile bulgar i e uniko kos ku e piesa ta bisa ta: "hisa bo saya te na rudia, manda bo mannan na laira i saka e boem". Ningun ora so e kansion no ta stimulá ningun hende pa bai den e direkshon ku nos a bin konosé e piesa aki na Kòrsou. Es mas, LA PRENSA mester muestra ku djadumingu ei nos tabata na Aruba, kaminda nos a mira e marcha di Sanicolas, kaminda aya tambe Saka e Boem tabata e

piesa mas toká. Ora ku e kantantenan tabata bisa "hit the floor", tabata masha leuk pa mira kon e muchanan, pero tambe hendenan grandi tabata bai suela riba nan mes i sin kontakto ku otro tabata move. Kontrali ku Kòrsou, kada ken riba nan kurpa tabata hasi nan movishon. Ta na Kòrsou aki, nos a kue e piesa aki i hasié un baile bulgar.

E diskushonnan di e dianan aki ta laga nos korda un dos aña pasá tempu ku Wilfrido Vargas a lansa "el baile del perrito", kaminda den un forma inosente a traha un baile, pero ku algun hende a kue i hasié un baile erotiko.

Despues di baile del perrito, a sali tur sorto di baile, inkluyendo baile di Kabritu, baile di porko i baile di mono. Tur kos basikamente ta depende kon nos hendenan ta mira e asunto aki i kon leu nos ke pa e asunto di karnaval aki bai. Ningun hende no mester perde for di bista ku Karnaval ta un fiesta di karni. Karna-vale, e karni ku ta ser laga liber, pa su kuenta etc etc. Hopi kos ta sosode den temporada di Karnaval ku no por mira lus di dia. Hendenan ta pa nan kuenta. Djárasen despues di Kimamentu di Rei Momo, katolikonan ta bai tuma e krus di shinishi riba nan frenta pa despues drenta 40 dia di yuna. Prohibi no por prohibi e piesa aki, pero ta nos hendenan mester ta mas responsabel na momentu di baila e baile aki.